

Zeitschrift: Annalas da la Societad Retorumantscha
Herausgeber: Societad Retorumantscha
Band: 100 (1987)

Artikel: En memoria da pader Iso Müller : (1901-1987)
Autor: Brunold, Ursus / Müller, Iso
DOI: <https://doi.org/10.5169/seals-235211>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use


The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 01.04.2026

ETH-Bibliothek Zürich, E-Periodica, <https://www.e-periodica.ch>

En memoria da pader Iso Müller

(1901 1987)



Il 11 da schaner 1987 ei pader dr. Iso Müller morts en claustra a Mustér, strusch in meins suenter haver cumplenu siu 85avel anniversari e suenter cuorta maldispostadad. La mort ha priu tut bufatg la plema orda maun al nunstunclenteivel prescrutader dall'historya. Quei che resta dil trapassau ei l'ovra impressiunonta e multifara da sia veta, ch'ei vegnida apprezziada dalla scienza, in'ovra che cumpeglia varga 350 publicaziuns.

Per quels che han accumpignau pader Iso in cuort tschancun da sia liunga veta, resta denton bia dapli che quei che lai dumbrar, pesar ed analisar. En amitgs e scholars viva la memoria vid in fegl da s. Benedetg, ch'ei sestentaus cun tut sias forzas ed a moda consequenta da contonscher tenor la regla monastica «la giustia perfetga». En la regurdientscha da pa-

der Iso viva si'egliada allerta e critica denton beinvulenta e plein capientscha. Nus vesein ses egls che savevan glischar dalla legria, siu rir da furbaz che vargava schi spert sur sia fatscha, udin siu rir che vegneva adina da cor. Siu quita prudent e savieivel per siu tgierp spossaus dalla vegliadetgna ha fatg attenta la generaziun giuvna da duvrrar spargnusamein e prudentamein las atgnas forzas. Gie, il beinstar familiar e professiunal dils giuvens, da ses anteriurs scholars, era per el buca mo zatgei superficial mobein in quita che vegneva da cor. Denton era cheu haveva el mesira ed enconuscheva ils cunfins; esser insistentis ni schizun mulestus secumpurtava buc cun siu character scolaus en la regla benedictina.

Lein dar in'egliada sin la provegnientscha e sin l'ovra dil defunct. Iso Adalbert Müller ei naschius ad Altdorf ils 13 da december 1901. Il temps gimnasial ha el passenta tier ils gesuits a S. Pieder (Feldkirch) e tier ils benedictins dalla claustra da Nossadunnaun, nua ch'il historiograf d'art pader Albert Kuhn ha giu grond'influenza sin el. Igl onn 1922 eis el entraus en la claustra da Mustér. Suenter il studi dalla teologia a Bregenz ed a Nossadunnaun ha el retschert l'ordinaziun sacerdotala igl onn 1927. All'universidad da Friburg ha el frequentau lezziuns da historia e da disciplinas parentadas ed era da latin. Igl onn 1931 concluda el ses studis cun la dissertaziun davart il temps tumpriv dalla claustra da Mustér. Silsuenter ha el opera duront decennis sco scolast da historia al gimnasi e sco archivar dalla claustra da Mustér.

Dapi sia dissertaziun ei adina la historia dalla claustra da Mustér e da siu seigneradi, che cumpigliava el temps medieval ultra dalla Cadi era la Val d'Ursera, stada el center da sia lavur. Duront sia activitad da perscrutaziun ha el tractau en numerusas contribuziuns ils aspects centrals dalla historia politica, culturala ed ecclesiastica dalla Surselva dil temps medieval tumpriv viaden el 19avel tschentaner. Pader Iso vala senz'auter per il pli impurtont historiograf dalla Surselva.

Pader Iso Müller ei staus in da quels paucs historiografs che dominava ton la perscrutaziun detagliada sco era la presentaziun generala da temas historics dil temps medieval e dil temps niev, e quei a moda meisterila. Analisis subtilas e minuziusas dil «Testament da Tello» digl onn 765 e contribuziuns fundamentalas davart ulteriuras damondas difficilas dalla historia medievals dalla Currezia han fundau sia reputaziun el cercchel dils medievists sur igl intschess da lungatg tudestg ora. Numerus concepts che han amplificau e sviluppau vinavon motivs directivs ha el scret a vesta dad ovras pli grondas gia planisadas. Adina puspei ha el

denton giu la vasta egliada e l'energia per la sintesa. Aschia lain las monografias e cudischs pli gronds percorscher il spectrum ed il svilup dalla entira ovra: l'istoria dallas claustras da Mustér e Müstair da lur entschattas tochen al temps dad oz, ils signurs da Tarasp, l'istoria culturala dalla Currezia medievals, l'istoria dils stadis dils pass en las Alps centralas, impurtonts studis era davart il svilup da lingua e litteratura retoromontscha, cristianisaziun digl intschess dallas Alps, contribuziuns tier l'istoria dil monachissem occidental, l'istoria dalla Val d'Ursera, P. Placidus Spescha.

Sias lavurs sedistinguan tras dira e solida lavur endinada allas fontaunas e tras lur varietad da metoda. Aunc en siu davos studi davart il temps tumpriv dalla claustra da Mustér (1986) ha el mussau a moda exemplarica co rests da mirs e da frescos, rapports davart in sarcofag e nums da muntgs ord cudischs da confraternitads san cumpletar gie schizun explicar in l'auter.

Sias publicaziuns vegnan legidas bugen buca mo pervia da lur cuntegn beinfundau, mobein era muort la moda da s'exprimer claramain ed entelgeivlamein per mintgin. Igl autur ha vuliu che biars sappien parter cun el il plascher ed igl entusiassem per l'istoria. Era sco scolast d'istoria ha el dau vinavon quei tschaffen. In bien tozzel da ses scolars ei sededicaus al studi dall'istoria.

L'ovra da pader Iso Müller ei vegnida distinguida pliras gadas. Aschia ha la facultad teologica a Lucerna honorau el cul doctorat d'honor, il cantun Grischun cun il premi da cultura, la societad generala svizra d'istoria e la societad historica-antiquarica dil Grischun han undrau el cul commemoradi d'honor. A caschun da siu 70avel ed 85avel anniversari han collegas dil rom, scolars ed amitgs surdau al perscrutader ina scartira festiva.

Cun la mort da pader Iso Müller ha buca mo in historiograf exemplaric bandunau nus per adina, mobein era in carstgaun amicabel e d'ina natira sereina.

Ursus Brunold